


# ALAKAMISY MASINA - TAONA - B



## *Dia fara fitiavana no nataony tamin'ny*

Ry Kristianina havana, manomboka amin'izao Alakamisy masina hariva izao ny fankalazana fanaontsika ka antsointsika mahazatra hoe “Tridium Pascal” izany hoe ny hateloana masina hankalazantsika ny Paka. Ho antsika ny fankalazana dia sady fahatsiarovana no zary fiainana

izay ankalazaintsika ary izany no ataontsika amin'ny litorjia izay asan'Andriamanitra satria miaina izay ankalazaintsika isika. Iza hateloana masina izao no maro fihetsika indrindra hanehoana io “asan'Andriamanitra”. Tsy sanatria manao teatra isika fa kosa noho ny Asan'ny Fanahy Masina dia manatanteraka ny tenin'I Kristy “Ataovy izao fahatsiarovana ahy”.

Vakiteny I : Eks. 12, 1-8, 11-14  
Tononkira : Salamo 115  
Vakiteny II : 1 Kôr. 11, 23-26  
Evanjely : Jo. 13, 1-15

Andro lehibe ho antsika tokoa ity androany ity fa indrindra amin'izao andro sarotra atrehintsika izao KORONTANAVIRUS izao. Feno tebiteby isika mianakavy. Tsy Krizy arapahasalamana fotsiny fa krizy mandrava hatramin'ny fototra maha olona mihitsy araka ny fantatsika. Mampahatsiaro ny faharavana tamin'ny fahotana fototra.

Famindram-pon'Andriamanitra ka tsy namela antsika ka naniraka an'I Jesoa zanany lahitokana hamerina indray antsika amin'ny hasina mahazanaka. Tonga nofo I Jesoa ary nanolotra ny aina mba hanarina indray izao rehetra izao izay efa potika sy rava ao anatin'ny fanekem-pihavanana vaovao. Araka ny voalazan'I Jeremia Mpaminany tamin'ny Alahady fahadimy amin'ny Karemy : Hataoko ao anatinareo ny lalàko, dia sady hosoratako ao amponareo ; ka Izaho ho Andriamanitrareo, ary ianareo ho oloko. Mila finoana, mila fanantenana, mila fitiavana izany mba ho tanteraka. Izany no mahatonga ny Papa milaza amin'ny hafatra amin'ny Paka hoe : Havaozy ny finoana, ny fanantenana rano velona, ny fitiavana. Io ihany koa no antintranterintsika ao amin'ny Hafatra faha-8. Izany rahateo no Paka ary izany no « départ vaovao », Fiaingana Vaovao » irintsika. Mankalaza ny Paka isika

mandritra ny hateloana masina. Paka izay midika fandalovana ka miala amin'ny fiainana tsizarizary mitondra amin'ny fahafatesana mba hiditra amin'ny fiadanana lavorary. Mirefarefa amin'ny tany fiainantsika raha tapaka ny fifandraisantsika amin'Andriamanitra, amin'ny namana ary amin'ny zava-boary noho ny hetraketraky ny ratsy, noho ny fahotana ary io indrindra no mitranga amin'izao ka hitantsika raha mandinika ny zava-misy eo anivon'ny fiainantsika ankehitriny. Milaza miara-mahita isika fa potika ny fifandraisantsika samy olombelona noho ny fontsika anjakan'ny ratsy dia ny fialonana, ny fitiavan-tena, ny avonavona, ny lainga sy ny fitapitaka ary ny risoriso, ny fampanjakana ny tsy rariny... Vokatry'izany vonoan'olona, herisetra, tsy fandriampahalemana no manjaka. Ny lojikan'izao tontolo izao, ny hevitr'izao tontolo izao no entintsika mamolavola ny fifandraisantsika ka ireo madinika tsy manan-kianteharana no mandray ny vokatry'izany rehetra izany matetika satria ady sy famonoana no manjaka. Izany koa no manjaka amin'ny fifandraisantsika amin'ny tontolo iainana sy ny manodidina antsika. Potika ny tontolo iainantsika noho ny fitiavana mandringana ny zava-boahary nefa isika ihany no mandray ny voka-dratsin'izany.

Raha mankalaza an'izao hateloana masina izao isika dia mampiditra antsika amin'ilay fifandraisana vaovao nohavaozin'i Kristy tamin'ny alalan'ny nanolorany ny tenany tamin'ny hazo fijaliana. Miditra amin'ny fanekem-pihavanana vaovao. Mila fiovam-penitra mahery vaika (changement radical de comportement) hanaovantsika dingana (passage=paka) ka hirosoana amin'ny départ vaovao.

Izany no dinihantsika sy halalinintsika amin'izao hateloana masina izao : Alakamisy, Zoma, Asabotsy masina sy Alahadin'ny Paka. Fototra sy loharanon'ny fiainana sy finoantsika ny "Tridium Pascal", hibanjinantsika ny fijaliana, ny fahafatesana, ny fandevenana sy ny fitsanganan'i Jesoa Kristy ho velona.

Ny evanjely androany mampahatsiahy antsika ny sakafo farany niarahan'i Jesoa tamin'ny mpianany ary tian'ny Eglizy ho tsapantsika lalina tokoa ny fihetsika nataon'i Jesoa raha nanasa ny tongotry ny mpianany izy izay manambara fa i Jesoa dia maneho manontolo ny fahavononany hanompo ary izany no lalana hahafahantsika mampiova hihatsara ny fifandraisantsika amin'Andriamanitra izay mihapotika sy ny fifandraisantsika amin'ny namantsika sy ireo manodidina antsika ary amin'ny tontolo iainantsika. Amin'ny alalan'ny fanompoana no hahafahana manova ny zava-misy iainantsika ankehitriny ka manapotika ny fiainantsika. Ny fanompoana no handresentsika ny ratsy, ny fanompoana midika fitiavana. Raha mifankatia isika dia mirindra ny fifandraisantsika amin'Andriamanitra, milamina ny fifandraisantsika samy olombelona eo anivon'ny fiaraha-monina, mamokatra indray ny fifandraisantsika amin'ny zava-boary. Io no asongadin'i Papa ao amin'ny Ansikilika "Fratelli Tutti" (Olo Araiky sika jiahy). Tsy ho hisy tokoa izay maha-olo araiky antsika jiahy izay raha tsy ao anatin'ny fanompoana entanin'ny fahamarinana sy fifankatiavana ary fifampitsimbinana. Io fanompoana io tokoa no manosika ny tsirairay hikatsaka ny soa iombonana.

Midera sy misaotra an'Andriamanitra isika satria manana ohatra velona eto amin'ny Nosintsika Madagasikara. Tsy iza izany fa ireo Olomasina sy Olontsambatra malagasy. Ao I

Victoire Rasoamanarivo, ao Lucien Botovasoa. Nasongadiko manokana izy mianadahy mianaka satria Renim-pianakaviana ary Raim-pianakaviana. Ny fianakaviana tokoa no tena mitondra faisana (victime) amin'izao krizy izao. Ary ny Papa nanolotra an'i Md Josefa ho modely sy mpivavaka. Mila Baba izao andro izao. Mila Fon-dray, Fon-dreny, Fon-dray aman-dreny izao tontolo izao ny Papa. Enga anie mba ho tahaka an'i Lucien Botovasoa, tahaka an'i Victoire Rasoamanarivo isika. Izy ireo dia niaina tokoa ny fifandraisana tanteraka tamin'Andriamanitra, nanompo ny namana sy ireo madinika tsy misy mpiahy. Fanompoana midika Fitiavana, ary fitiavana no mampiray amin'Andriamanitra. Enga anie araka ny voalazan'i Papa mba samy hahita sy hivelona ny v&ocirc;kasion'ireo ray, ireo ray aman-dreny rehetra.

Ny fanasan-tongotra dia efa manambara ilay fanoloran-tena nataon'i Jesoa teo amin'ny hazo fijaliana. Azo lazaina fa sakramenta manambara ny famonjena nentin'i Jesoa ny fanasany ny tongotr'ireo mpianany.

Tsara asongadina koa ny resaka nifanaovan'i Jesoa sy Piera tamin'ny fanasana tongotra, saika tsy hanaiky ny fanasan'i Jesoa tongotra azy i Piera, ka novalian'i Jesoa hoe : *“raha tsy sasako ianao dia tsy hanana anjara amiko”*. Ny tian'i Jesoa ambara dia fomba iray tsy maintsy atao izany fanasan-tongotra izany mba hiombonana tanteraka Aminy satria tonga hanompo fa tsy ho tompoina. Manambara fifankatiavana ny fanompoana, manambara fa tsy misy intsony ny elanelana ka izany no nahatonga an'i Jesoa nilaza fa fampianarana no omeko anareo ka aoka hanao izany amin'ny rahalahinareo ianareo, *“Moa fantatrareo va izay nataoko taminareo? Ianareo manao Ahy hoe Mpampianatra sy Tompo, ary marina ny fil&acirc;zanareo; fa izany tokoa Aho. Ka raha Izaho Tompo sy Mpampianatra aza nanasa ny tongotrareo, ianareo samy ianareo koa dia tsy maintsy hifanasa tongotra; satria nomeko fianarana ianareo mba hanaovanareo toy ny nataoko taminareo”*.

Ohatra lehibe ny nataon'i Jesoa, manambara sakramenta fanorenana io fanasan'i Jesoa ny tongotry ny mpianatra io. Fanorenana ny fanavotana antsika sy l&acirc;lam-pamonjena ho antsika izay mitondra antsika amin'ny famakiana ny mofo izay hifampizarana amin'izao Paka izao sy hitondra antsika amin'ny famonjena ka manavao ny fifandraisantsika amin'Andriamanitra sy amin'ny manodidina antsika ary amin'ny zava-boaary. Izany fifampizarana izany dia manambara ihany koa fa miova mihatsara ny fifandraisana. Raha te ho G&eacute;n&eacute;ration des Batisseurs isika raha te ho taranaka manorina dia ny fanomponana no hany lalana mitondra antsika amin'izay fanorenana izay. Ho EOVI MISIONERA VITA BATEMY KA IRAHINA HO TABERNAKALA VELONA MANORINA ETA tokoa isika raha vonona hanompo.

Teo amin'ny fomban'ny Jody, ny mofo dia tena sarobidy, manambara aina sy fanomezana aina, hitantsika amin'ny evanjely fa ireo izay voailikiliky ny fiaraha-monina rehefa noraisin'i Jesoa sy nantsoiny tahaka an'i Zak&eacute;, tahaka an'i Matio dia niafara tamin'ny fiaraha-misakafo. Manambara fiainam-baovao ao amin'i Jesoa ny famakiana mofo. Enga anie ny Fankalazana ny Alakamisy Masina ao anatin'izao Krizy izao hitondra antsika amin'ny d&eacute;part vaovao.

Isaky ny mankalaza ny Eokaristia isika dia sady manambara ny nahafatesan'i Jesoa no mankalaza ny nitsanganany ho velona, miandry ny hiaviany ka mampiombona antsika tanteraka ao Aminy. Izany no dikan'ny mofo natolony ho antsika sy ny ràny mba hahazoantsika ny aim-baovao vokatry ny fanavotany izay notanterahiny tamin'ny fandalovany tamin'ny hazo fijaliana.

Amin'izao andro fankalazana ny nanorenan'I Jesoa ny Eokaristia izao dia aoka isika tsy hankalaza fotsiny ka manatanteraka ny fihetsika nataony fotsiny fa aoka hanatanteraka izay nataony dia ny fanasana ny tongotra, ny fanompoana, ny fanolorany ny tenany amin'ny mofo sy divay handraisantsika ny ainy. **ATAOVY IZAO HO FAHATSIAROVANA AHY** , hoy I Jesoa. Ho zary **EOV** tokoa isika raha **MANAO IZAY NAMPANAOVIN'I JESOA** ary izay no maha olo araiky antsika jiaby.

Ry Kristianina havana, aoka isika isaky ny mandray ny vatan'i Kristy hanao ny fiekem-pinoana fa tena i Kristy tokoa no raisintsika, aoka isika hamaly "Amen" amin'ny feo mazava tsara ka heno tsara ny valin-teny ataontsika mba hanambarantsika fa miombona tanteraka amin'i Kristy isika (komonio). Mitoetra ao amin'i Kristy isika noho izany hitoerany koa satria raha Izy no mitoetra ao amintsika, Izy izay naneho ilay fara-fitiavany tamin'izy nanasa ny tongotra dia izay fara-fitiavana izany koa no mibaribary tamin'izy nanolotra ny ainy tamin'ny hazo fijaliana ho rentsika amin'ny Evanjely amin'ny Zoma masina fa misy rano sy rà mivoaka avy ao amin'ny fony, mampibaribary ny fanorenany ny Eglizy, mampibaribary ny fitiavany antsika ka andraisantsika ny ainy. Izany no mahatonga antsika mba manokana ihany koa ity alin'ny Alakamisy masina ity hiombonana Aminy, raha miara miari-tory Aminy isika dia manantena ihany koa fa hiaraka Aminy amin'ny fitsanganan-ko velona.

Ry Jesoa Tompo ô, nametraka ohatra velona ho anay lanao amin'ity Alakamisy masina ity, maro ny zavatra nanehoanao izany ohatra velona izany. Ny fanasana tongotra izay mampibaribary fa tsy tonga ho tompoina lanao fa nanompo ary izany no làlana hampiova ny fifandraisanay amin'Andriamanitra sy aminay samy olombelona ary amin'ny zava-boaary. Ry Jesoa ô, nametraka ny Eokaristia lanao, ny famakiana ny mofo dia manambara ny fifampizarana sy ny fifandraisana Aminao, mifampizara aina aminay lanao, nomenao anay ny ainao amin'ny alalan'ny Eokaristia ka enga anie izahay ho vonona ihany koa hanome ny ainay, hikatsaka mandrakariva ny soa iombonana. Raha mifanasoa tokoa izahay dia hiova ny fifandraisanay amin'Andriamanitra sy amin'ny mpiara-belona aminay ary amin'ny zava-boaary ary dia ho tanteraka ny antso avo ataon'I Papa mba ho "olo araiky tokoa izahay" (fratelli tutti).

Ry Jesoa Tompo ô, ampianaro izahay hahay hifampizara sy hifanompo. Enga anie hivelona ny ohatra nomenao anay izahay. Masina Maria reninay, Md Josefa, mivavahà ho anay mba hahay handray an'I Jesoa izahay amin'izao Paka izao ka hiova ho olom-baovao, ho **EOV MISIONERA TABERNAKLA VELONA. Amen**

Mompera Arseveka Mgr Benjamin Ramaroson